



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

9. Kalenderwoche – ab 01. März 2009

Schwarze Leschor

Im Weldall ohm, da solls ja so schwarze Leschor gähm, wo alles, was in de Nähe kommd, drinne vorschwindn dud. Die schwarzn Leschor dord ohm häng irschendwie mid dor Maderije zusamm, die sisch dorde irschendwie in riesnhafdor Menge zusammgeglumbd had. Ob dor liebe Godd ooch seine Hand im Schbiele had, is noch nisch ganz rausgeforscd.

Un irschendwie musses ooch off dor Ährde solsche schwarzn Leschor gähm. Das dud ja im brivadn Bereisch anfang. Bledzlish is die Budlmidze weg! Wose doch noch vorsches Jahr dagewähns is. Abor nee - jedzde wo de se brauchn kennedesd bei dähm Sauweddor, da isse weg! Odor ooch dähr Flaschneffnor! Weg!

Guhd, isch will ma sachn, dähr Flaschneffnor war bloß geklaud. Aus dähm Hodel wo mir vorsches Jahr gewähns sinn... - abor drodzdähm! Die von dähm Hodel wern doch nisch dursch de Lande ziehn un alle geklaudn Flaschneffnor zuriggholn! Da missdn die ja ganze Heerscharen von Dedegdiefe losjachn! Nee, das Vorschwindn von dähm Flaschneffnor dud sisch am eenfachsdn erglärn, wenn de annemm dusd, dass da irschendwo so e schwarzes Loch is, wo dähr neingezuschd wordn is. Odor wenn isch da ooch ma an die Finanzgriese erinnorn darf!

Die is ja immor noch nisch ganz iborwundn. Eene ganz erschdaunliche Lähbensdauer! De Finanzgriese dauord ja jedzde schon längor als wie de Umweldgriese odor wie de Vochlgribbe. Ma ganz zu schweischn vom Rindorwahn. Dor Rindorwahn is ja middlorweile dodahl in dor Vorsenkung vorschwindn. Odor ehm villeischd in so e schwarzes Loch neingezuschd wordn!

Un bei dor Finanzgriese... das ganze viele Geld... die ganzn Milljardn von Dollars un Euros un Rubels... rischdisch! Wemmor annemm dud, dass da irschendwo so e schwarzes Loch is, dann is das alles ganz eenfach erglärd. Fludsch - un weg warnse!

Nu denkn ja mansche, dass das schwarze Loch in dor Schweiz schdehn dud. Genau - das Ding, wasse da fiehr de Wissenschaft gebaud hamm. Dähr Deilschnbeschleunischor, dähr de Adomdeilschn beschleunischn dud. Das Ding soll irschendwie durschgedrehd hamm. Gollabierd! Un nu hammor e schwarzes Loch. In dor Schweiz. So denkn mansche.

Annre dun denkn, dass das schwarze Loch mähr die Schweizor Bankn sinn. Odor de Gier von de Bankmenedschor, die eenfach dähn Rachn nisch voll genuch grischn kenn!

Meine Gudste nu abor, die sachd, ich missde mir werglisch keene Gedankn weidor machn, wo das schwarze Loch schdeggn dud. Die sachd, das schwarze Loch däde eenfach im Sysdehm schdeggn. Das Sysdehm is das schwarze Loch. Un wemmor nisch offbassn dädn, sachd se, dann dud das Sysdehm am Ende nisch bloß Milljardn an Geld vorschluggn, sondorn ooch de Umwelt un das Glihma un uns selbor ooch. Nee, werglisch - meine Gudste dud manschma sähr schwarz sähn. Das Geeschndeel von eenor Hellsähorin! Ehm ooch sowas wie e schwarzes Loch!

Eduard Sachsenmeyer